

巡按直隸監察御史臣房 謹

題爲陳州之兵取有因臨淮之事出不意謹
據事直陳巔末仰祈



聖鑒事項因妖禍東省勢急南浸夏鎮之焚劫
旣慘徐州之草木皆兵訛言競起人心頓
離致使維揚數百萬家若民若商總皇皇
莫知所適無貧無富皆汲汲顧而之他市
上擔夫爲人暗搬行李計一日有幾錢之
資江邊舟子爲人偷載家口較平時有數

倍之利甚至身死臭腹而無悔資藉盜糧
而不顧維揚財賦之鄉此等光景果安乎
不安乎運司

國課之儲此等時候當守乎不當守乎臣日
夜焦思求所以爲有備無患之策乃署疏
理鹽法道事叅政馬從龍者固與臣共以
守運司爲事者也因屢言於臣謂河南陳
州有義士宋一范者係舊兵科都給事中
宋一韓之弟家散千金聚鄉人貳百餘名

訓練業已經年人人勇敢絕倫非烏合者
比及今取來防衛運司或者可恃以無恐
夫以疏理而籌運帑之事其心思必周以
同鄉而談里閭之人其聞見必確職掌所
係彼此關心况今春季餘銀叁拾餘萬見
貯在庫外賊之突犯固可慮內奸之窺伺
更可憂也且陳州隸在臣屬一水之便非
遠莫能致也人止二百數舟可航非芴莫
可馭也疏理道原缺額兵二百尚未收補

非創爲增置也東路未通積貯固須防守
卽東路稍通起解亦須獲送又况乎轉盼
間秋季餘銀叁拾餘萬行將徵收斷不敢
以此百萬金錢輕付於一二解官以及數
十服役應差者之手籌畫再四計無復之
遂差揚州衛指揮繆國用持檄至陳并携
行糧二百金當官給散令各兵自帶平日
演習弓矢器械等項覓舟計日起程仍檄
諭宋一范以自募自領之兵須沿途約束

不許生事騷擾又思各兵旣登舟矣止給
馬捌匹以爲領兵起陸之用不給以牌批
者恐其沿途之擾百姓也不與以勘合者
恐其沿驛之索夫馬也不意一范遂將往
日舊有大同撫臣符驗一紙填給廩糧馬
匹并人夫貳拾肆名前來行至濠梁驛索
取夫馬於驛官遂與驛率角口噫此禍根
也何以言之論地則兩淮雲中參差人心
已疑矣論人則語言狀貌粗魯人心已驚

矣論事則以盤詰羈留舍舟登岸人心更
疑更驚矣以可疑可驚之人值正疑正驚
之時經易疑易驚之地疑以傳疑驚復生
驚地方官安得不爲地方計此發兵圍擒
之由也夫兩入相角行者避路而况於千
餘名官兵執縛貳百餘人何恠乎居民之
掩關遁跡而市肆之閉戶潛踪也所幸此
輩委係良家自恃其無他遂甘心束手暫
聽縛焉以待論定不然而果屬匪類抑或

素無教習能必其不迫而走險挺刃而格
鬪乎當此士馬洶湧兵戈叢雜之際一格
鬪則無所不至矣勢必使濠梁一片地倏
化而爲戰爭之場矣又何能有今日哉言
念及此臣不覺心膽欲碎隨據鳳陽府并
臨淮縣兩處申呈到臣當卽批發頓州道
兵備僉事魏士前查審去後續據本官備
詳回稱遵依會同守備太監金忠知府呂
封齊署留守王家柱等秉公面審得宋一

范等實良家將材子也慕義遠來其志可嘉其情可憐今若以一人索夫馬故任咎不無灰壯士之心合無俱令發回原籍於情法兩得其中耳回覆到臣并通詳撫按矣嗟此無辜生者俱成殘廢死者已填溝壑殘廢餘息固爲流落含冤之人溝壑枯骨終作異鄉飲恨之鬼嗟此無辜何以至此向使地方官一聞臣取用之說便馳報一文通問於臣姑將此衆縻之絆之而詳

察其真僞則自可無事於兵卽不然而兵已發矣亦第令散處密布靜以待之務候臣文至日以徐決行止則爲地方者不失其爲地方爲庫藏者終成其爲庫藏方且兩利而俱全又寧復有今日之事哉寧復有今日之事哉總之此一事也在臣以運帑課銀關係最大原因防賊以募此兵在郡邑以地方保護關係最大遂因防賊以疑此兵當地方多事之時而又多此一畚

意外之事果劫數之使然乎何機局之適
奏若此也嗟嗟此兵之摧折極矣存亡半
矣不幸固在此兵然遠邇宴然士民安堵
毫不至貽害於地方是又地方之大幸而
臣之大幸也嗟嗟事已至此矣計更無復
之矣徐州之傲報狎聞司帑之防守何策
戶部之催餉甚急起解之護送何人臣於
此時真寢不帖席而食不下咽矣誠恐道
路之口耳易訛傳聞之情形不一安知不

以無爲有以小爲大以虛爲實故敢不避
斧鉞直陳其巔末如此奉

聖旨宋一范仗義助兵何以輕致傷損還着查
明具奏鹽課銀着作速查解用該部知道

巡按直隸監察御史臣房 謹

題爲無辜被繫枉殺太慘仰祈

聖明勅下撫按嚴究處分以振法紀以慰冤魂
事頃臣之檄取陳州宋一范等二百人也
蓋據署疏理道馬叅政屢稟爲目前喫緊
防守運庫并沿途護解餘銀計也其詳已
載臣前疏中自有濠梁驛驛丞葛大化之
挾讐捏報而妖黨之說突然起矣此猶日
爲可疑也自有署臨淮縣通判汪從龍之

誤聽妄申而擒拏之兵突然至矣此猶曰
爲地方也自有勤師動衆執縛二百餘人
之役而留守司鳳陽府鳳陽衛臨淮縣之
囹圄突然滿矣此猶曰待鞫問也逮至潁
州道魏僉事會同守備司府等官從公鞫
審委無別情亦旣奉有各撫按并臣批俱
令釋放回籍矣及據該道回稱則留守司
宋一范等四十六名釋放矣鳳陽府劉一
豹等四十六名釋放矣獨至鳳陽衛則王

有德等四十二名歿矣臨淮縣則商繼存
等四十六名又歿矣臣一見之不覺氣填
膺而髮上指有是哉枉殺無辜一至此慘
乎成何世界成何紀法也獨不思

朝廷立法或重或輕原有定律人臣奉法一
入一出必湏比律然總之以得其真情爲
主而後輕重出入次第布之以成遠邇上
下相守相安之法故僞造烏有之情以爲
情而遂謂法應如是固法之所不載也雪

用無章之法以爲法而謬謂情本如是亦情之所不載也今以宋一范等之情而言其應募而至者是其從來之情也其與驛卒相毆者是其適遇之情也情如是法亦如是原無死法而何以竟置此百人於死臣於此不能爲之解而更不能不爲之疑矣謂各官以意死之耶而律安在謂獄卒以私死之耶而官安在謂鞠前死之耶則真僞未判其人爲待審之人待審而何以

死謂鞠後死之耶則真僞已明其人爲無罪之人無罪而又何以死且何以監之留守司者無恙也而鳳陽衛者獨死監之鳳陽府者無恙也而臨淮縣者獨死嗟嗟此輩素以膂力武藝自負其勃勃慕義遠來實欲藉尺寸之樹立以稍自見其生平乃不料以無蹤無影說鬼說夢之讐口而竟至橫遭此無端枉殺之慘冤哉此無辜也旣已不能生而爲明明白白之人矣然或

歿於斬絞流配則歸咎於自作之孽或歿於疾病水火則諉數於天降之殃卽或歿而棄屍沙漠暴骨戰場不名之爲

朝廷捐軀赴難之英雄必目之爲主將同心戮力之烈士此之爲歿更得歿所乃今固一切已矣在歿者相顧而迷悶於幽眇冥漠之鄉固不自知其所以致歿之故卽在歿之者獨居而細反其暗室屋漏之良亦不自知其所以歿之之由現前不察悔後

何益寃哉此無辜也且并不得歿而爲明明白白之鬼矣嗟嗟螻蟻蠅蠖亦屬性命飛霜不用只爲含寃豈其百人竟枉歿遊魂冉冉定團結而不肯散陰風烈烈特飲恨而不能言嗟嗟此輩俱有父母妻子誰無親戚骨肉分百家而忽焉悲號於四境則陳幾鼎沸合百家而卒然捨呼於一門則宋當蓬粉興言至此腸且寸斷此臣之所爲感逝悼亡蘊憤增哀不能自已於

傷心之淚因不能自己於請劍之誅也蓋
臣實不忍見此清平世界而網羅彌天更
不忍見此文物乾坤而紀法掃地故吊灰
瘞骸問孤恤後除臣自捐俸給量行優恤
其家外懇惟我

皇上照以日月斷以雷霆

勅下撫按衙門嚴究鳳陽衛臨淮縣監死無辜
王有德商繼存等多命情節或係非刑需
索或係禁食凌虐或係各官之主使或係

獄卒之妄爲務得確狀分別奏處庶紀法
因之少伸而冤寃藉以少慰矣奉

聖旨這監斃募丁多命冤慘非法該衛縣掌印
官着撫按官嚴究叅處該部院知道

巡按直隸監察御史臣房 謹

題爲內地軍興特從輿議留府守改監司綜
理兵馬重務以戡禍亂事案查本年五月
二十三日據淮安府闔郡鄉官梁仲仁等
舉人蔣莊等貢生楊繼長等監生劉一鑿
等生員楊于臣等鄉民趙禮等連名條議
內開本府宋知府仁廉果毅鉅細修明淮
郡恃以爲命前請加銜久任不意遽陞七民

惶惶叩

閹莫顧目今欲安淮地必須先留舊守或以新
陞憲銜留管府事或添設憲使留淮守禦
等情到臣隨批准徐道查議去後至次日
鄉紳士庶又具公呈內開本府宋知府蒞
任三載實心實政士庶口碑在在傳播聞
陞轉易州道闔郡赤子已切借寇况今東
省賊警接壤徐淮人情惶惶甚矣倘宋知
府一日離任則城池何人捍衛兵馬何人
簡閱糧餉何人積儲奸宄何人搜剔查萬

曆二十年關白猖獗淮地特設監軍
員專理軍務伏乞軫念咽喉重地比例
題改陞淮揚監軍道猶恐部覆稽遲更乞憲
牌先行宋知府分兵扼險守城詰奸庶人
心可固近憂可彌江淮半壁屹然長城可
恃矣等情該臣一面批行淮津道會同淮
徐道議留一面牌行該府卽以新陞副使
職銜管理軍務外竊照淮居南北之中襟
江帶海南連吳越北接燕齊爲

留都襟喉

陵寢肘腋一綫之脉關係非淺渺矣其軍馬重
務必須監司綜理故先年以揚州道兼之
曰淮揚兵備迨後以徐州道兼之曰淮徐
兵備至今無改往時一歲之間該道駐淮
者強半卽今右叅政施天德以經緯之才
肩茲劇任真恢恢有餘地矣不意東省寇
亂逼臨淮徐而徐屬更爲密邇該道防禦
征勦區畫方畧頃刻靡寧安得分身駐淮

又安可令其分精五百里之外一一料理
於淮哉故每有緊急事宜不得不與該府
商之幸知府宋統殷長才赤心與臣朝夕
共理不愛髮膚惟是軍務非府守職掌稍
有張弛便多推遜且本官已有易州兵備
之轉臣雖勉留之檄至再至三奈新銜久
奉

俞音易水又爲善地安肯依依於茲耳作一郡
有司耶卽臣亦不便以奉

命之兵備終以府事強之也鄉紳士庶相率額
留兩日兩詞一心一口若將以淮上離本
官一日不得而本官懾服羣情綜核庶務
亦真有離淮上一日不可者查倭警之時
委曾添設淮海監軍道事平而止今草賊
披猖詎比例於關白監軍之名似可不設
獨念咽喉重地軍務倥傯淮海兵備必不
可少若以本官任之專管兵馬錢糧居中
調度與淮徐兵備互相贊理俟內寇外侮

寧謐之日不妨再爲酌議矧舊按臣王
復

命疏中亦有江北應設守道之議或卽以本官
兼管守道諸務亦無不可至於廩糧俸鈔
等項查淮津道已議裁矣那彼給此儘足
支費是淮上去一道而補一道未嘗增設
本官以兵備而爲兵備不煩更張事之妥
便無踰於此臣謹會同總督漕撫戶部右
侍郎李 總理河道工部左侍郎陳 巡

按直隸監察御史吳 趙 合詞上

請伏乞

勅下吏部再加查議如果臣等所言不謬將新
陞易州兵備淮安府知府宋統殷以山西
副使改爲淮海兵備職銜專管兵馬錢糧
或兼管守道事務行臣等遵照施行奉

聖旨吏部知道

巡按直隸監察御史臣房 謹

題爲糾劾不職有司以肅吏治以蘇民生事
臣惟

國家之治亂係民生而民生之休戚係吏治
是吏治之汙隆固民之所視以托其樂生
之命而民生之休戚又商之所視以濟其
樂輸之源者也故通商必須惠民而惠民
必須察吏臣自奉

命督理淮漕以來無日不以惠民通商爲念且

惴惴焉惟恐不肖有司之爲吾民蠹而不
及察也顧臣入境受事之日正值

計典迫舉之時在諸臣之或露章或揭報已
無漏網在各屬之或新任或夙賢從何索
瘢况持斧巡行旣以奉

朝廷三尺之法以安民而察吏藉使民怨獲
免則察之出寬而弛也寃將墨吏得安其
位而民不得安卽不然而民戴蒙譏則察
之入深而刻也寃且良吏不得安其位而

民亦不得安縱及墨吏貽害固在地方摧
及良吏貽害又在人材至於害及人材則
奪所好予所惡是始以察之害害吏終更
以吏之害害地方矣臣爲此懼故寧遲而
指所信必不敢速而摘所疑默默在抱徐
徐至今始據道府開報及衆論僉同亟應
糾斥者得二人焉謹會同總督漕撫戶部
右侍郎李 爲我

皇上直陳之訪得原任定遠縣知縣陳九成才

原碌碌心復營營線索但只憑人欄柄遂
不由已一本官每日升堂全無紀法滿堂
皆係知縣一切縣事悉聽庫吏包選快手
朱合等顛倒撥置殘害驛遞凌虐小民以
致闔邑共怨一到任月餘有京人來縣討
債住歇朱合家與腹吏包選合謀替還京
債七百兩致本官溺二惡爲腹心凡事任
其詐騙該縣貧富無不受害一縣屬池河
驛因差繁錢糧不接向縣借支本官令腹

吏包選查索得常例五十兩遂擅將應解
錢糧那借八百兩給與該驛以致解京錢
糧不足復又責比小民花戶施應運等證
一詞訟不論告期每日隨投文進遞本官
並不親審總收衙內俱憑包選定奪有錢
卽准每一紙三五錢或一兩不等報差腹
快朱合等構結夥詐瓜分致貧民任尚敬
孫住郭文等以無錢誣徒致死鄉約薛天
玉等証一衙蠹鄧少泉逼姦民壯徐學禮

妻汪氏本夫撞遇具告本縣託包選朱合過付銀二百兩本官收受迺將學禮誣徒禁獄少泉用錢六千買禁卒薛文明等攔短獄食致成囹圄因將汪氏并家產見今強占爲業包選朱合仍得謝四十兩尺頭四疋徐汝汪仕學證一亳州大惡粟明邦戴九成等一起撫臣有行批道府轉行本官覆審明邦等暗托包選朱合假藉名色過付銀三百兩尺頭毫劍如意等物本官

收受延推不行問結致復駁懷蒙等縣見今未完楊大中蔣芷等証一亳州舉人于弘漸被族兄于好善侄于廷允同謀毒死批駁本官檢驗復審好善已託包選朱合過付銀三百兩因選自行索禮未饜囑官延推不結于廷美証一張橋驛聞本縣借銀與池河應遞亦赴本縣借支因先未與包選等說明致選具稟本官言張橋不係衝繁將錢糧俱侵肥本官聽信拘養馬戶

審情急奏銀一百兩與包選朱合收受將
養馬戶免究喻守梯徐李証一包選將起
解大馬價銀二千七百兩稟倉里長杜密
書等領解不料選暗先將天平針鉗定每
百兩兌發內少五兩不等共少銀一百五
十兩解役向稟本官不信反聽選稟將書
責治復差夥黨朱合押令交銀掣批仍索
錢三千文以致傾家杜密書審一本縣民
皂快手等役工食每年計約一千四百餘

兩往時按季支領本官聽包選朱合撥置
年終方給任憑選構結合將在庫官銀揭
買工食每季營利二百兩瓜分差人無不
怨恨民皂盛枝孔邦甫等審一本縣三十
三里走遞馬四十匹每匹領工食銀二十
五兩聽信包選撥稱地僻差少每匹扣工
食銀十兩作爲公費支銷馬戶馬虎等無
不怨恨一令三十三里里書僉報買鹽富
戶朱成宗楊成等一百餘家每家派買鹽

三五引不等聽信包選撥置每家過付銀二三十兩不等豁免計銀二千餘兩鹽累舊商人葛用張蛟等復買可証一徵收槩縣各項錢糧共約近三萬兩餘歲火耗約三千餘兩包選切証一聞報調繁指稱各處謝禮票差朱合同段舖戶買紗羅等項五六十匹每匹止給半價舖戶張世讀等無不怨恨此一臣者心竅不靈業已技窮而莫措耳根無主況且壑填而已盈瑣

穠不足當官殘虐何以撫衆所當重加降調以謝地方者也又訪得見任臨淮縣知縣朱孔昭器識本昏事爲多舛撫循尚未聞其策誅求已屢見所長一臨民生命最苦錢糧火耗本官將天啓元年拖欠鞭馬銀五千兩有餘索耗銀七百餘兩致解京正銀不完里長趙國禎等審一本官指報濠梁紅心兩驛拘僉馬戶約有百家被兵房吏汪若海書辦吳之弘撥置有贄禮者

作貧無贄禮者作富將曹真周大正賈大
壽王桐等每名索銀三二十兩不等共索
銀千兩有奇官吏夥分賣放至今未曾下
驛走遞仍索走遞馬頭林一正徐金銀陳
春柴逢山高汝學史邦昌樊貴栢等十數
名錢百串銀八十餘兩徑自豁免駟書宋
許審一縣民康洗將侄男康大漢生生打
灰埋葬半月事發本官聽信鄉里王涂快
手張文禮妄囑逆將無干生員楊兆年誣

陷將兆年子楊育棟坑陷黑獄兆年情急
奔告學臣批府審明得免本生証一本官
將糧房吏汪朝榮牛之奇禁監候筭四十
七八兩年折糧索取常例銀一百七十兩
汪牛二吏可審一本官索訪犯周士遠銀
五十兩故縱士遠誣告紅心驛完贓致使
馬戶懼怕逃走因而倒驛王繼唐審一該
縣庫吏每年十二月終交盤更換本官希
圖餽送捱至二月方行申請索新吏銀五

十兩不足貪心責治二十板又添銀五十兩方容交盤又索舊庫吏銀九十兩補作贄禮汪若海金印可審一本官將府發紅心驛馬價到縣驗封收寄在庫陸續給發希扣火耗常例又占用座馬承印馬共五匹每年侵得銀三百兩公直周士遠等審一將總舖集街民三十餘家票差許從德劉志學將戴閣等十八家責治俱送倉禁指稱馬價索銀八十兩未遂貪心不審不

放致坑衆叫苦戴閣等審一本官徵收天啓元年馬價銀一千八百五十兩零每兩索火耗一錢五分共索銀二百七十餘兩致使民怨載道包餅書手胡春軒等審此一臣者負疎庸謏劣之才新礪已鈍處衝疲繁劇之地末路難終物議亦旣沸騰當局何以展布所當量調簡僻以俟改圖者也伏乞

勅下該部再加查訪如果臣等所言不謬將陳

九成等照例議處庶不肖者知所懲而賢者益知所勉吏治民生未必無小補矣奉聖旨吏部知道

巡按直隸監察御史臣房 謹

題爲邊餉缺乏鹽課稽遲乞

賜照例考成以預儲蓄以濟兵食事案查先奉都察院勘劄准戶部咨運司鹽課每年以十月爲期依限全完者紀錄獎勵違限一月者罰俸二月者倍之此後以是爲差如違六箇月降職二級戴罪督催俸仍罰註以上俱停其陞考俟解完之日具奏

定奪俱於十一月終旬聽巡鹽御史將掌印及

經管官職名送部照前分別查叅及州縣之銷引不如額者聽鹽法道及運司每年終將正官職名開送巡鹽御史照依萬曆二十一年題

准事例如一萬引不及六千六百引一千引不及六百六十引三百引不及二百引者住俸如一萬引不及三千三百引一千引不及三百三十引三百引不及一百引者降俸二級一引不繳者卽行叅處必令賣完

足額方准開復未完陞遷給由不准離任起送各巡鹽御史亦不必拘定差滿務於年終據實叅

題以便覆核考滿給由照依京邊錢糧另文達部查考仍移咨吏部知會又奉都察院勘劄准戶部咨該本部

題覆兩淮鹽法道副使馬從龍條議一欵定分數以重考成照得運司之鹽課與府縣之錢糧無以異也自今以後凡銷引俱如

有司徵解錢糧非至八分不准給由陞遷
而完僅二三分及全未完者一如有司罰
俸奪俸降級等例施行又奉都察院勘劄
准戶部咨爲鹽政更新有機

功令申飭宜預等事該前鹽臣龍遇奇題條議
嚴督銷引以覈考成該戶部議覆凡鹽法
銷引俱如有司徵解錢糧須完八分以外
方准給由陞遷不及數者一如錢糧罰俸
奪俸降級等例施行此皆重其權於御史

而後各省直鹽法之官有所遵守專其責
於各省直鹽法之官而後各省直之有司
有所顧忌兩准考成姑斷自四十五年起
須照近例考覈而查叅年終務要年銷一
年決無姑息其在鹽臣着實舉行等因題
奉

欽依先後遵奉在案今臣接管查得鹽課考成
萬曆四十七年九月十四日以前已該前
差御史孫之益具疏查叅訖續自萬曆四

十七年九月十五日起至泰昌元年九月十四日止計已一年該前差御史馮三元行文查取省直賣過鹽數查叅間本官因病

請告回籍臣受事之始查照成例卽牌行整飭疏理兩淮并江西湖廣河南各鹽法道徽安寧太淮徐揚州潁州各兵備道應天府經歷司查取泰昌元年九月十五日京掣起至天啓元年九月十四日止計一周歲

將各州縣賣銷過綱鹽食鹽引數逐一分別已完未完各掌印署印官經管月日應銷引數文冊祇因省直遼遠催取不易兼駁查改正至七月內始得齊集又該臣轉發署疏理鹽法道事揚州道叅政馬從龍復加查覈分別殿最呈報到臣該臣備細較對相同惟是近日考成

題例森嚴而兩淮行鹽地方遼濶所以有司祇懼叅罰斤斤奉法惟謹今查江西九府

湖廣十三府州河南南陽府光州舞陽西
華等十四州縣并江南北直隸應天安慶
等府二年之內俱已完足十分其完報合
例八分以上者如河南開封汝寧直隸盧
州府等處例應免議及大計降黜被論事
故者俱不敢

瀆外所有完不及六分如陳州陞任知任徐宗
孺壽州署印本府陞任通判陶允嘉頰上
縣署印本縣儒學教諭劉光奕五河縣陞

任知縣盧自立完不及五分商水縣署印
陳州同知劉公仰贛榆縣知縣王希曾完
不及四分商水縣知縣俎鼎高淳縣署印
溧水縣知縣張錫命海州陞任知州加府
同知職銜楊鳳完不及三分臨淮縣署印
本縣陞任縣丞劉承德至如一引不繳陳
州衛掌印指揮胡守祚宿遷縣陞任知縣
董則喻清河縣署印本府儒學陞任教授
薛永寧安東縣署印山陽縣陞任教諭范

繼仁邳州署印本府同知蕭大成定遠縣署印壽州陞任判官蔣允京桃源縣署印本縣儒學陞任教諭梁嘉賓接管署印本府儒學陞任教諭薛永寧遵照

新例俱應罰治但內查陶允嘉蔣允京梁嘉賓薛永寧劉光奕劉公仰董則喻蕭大成代庖州縣署事僅僅月餘王希魯張錫命楊鳳范繼仁係行食鹽地方時時增減委難苛責宜從寬政者也至於徐宗孺俎鼎胡

守祚盧自立劉永德以上各官惟知供賦無暇問齟視

明例若弁髦以鹽法爲末務私販罔禁官課難銷轉輸壅滯兩淮庚癸喧呼九塞邊儲無補

國計奚裨所當照例分別罰治者也再照銷引考成實與徵解課銀表裏相維並皆綦重而兩年之間計解過餘銀一百四十萬兩有奇徵解如期寔道臣馬從龍精勤奉

職之效雅多勞勩雖經陞轉楚之憲長仍當從優紀錄者也伏乞

勅下戶部再加查議如果臣言不謬將道臣馬從龍照例紀錄徐宗孺等分別罰治庶勸懲明而

國法彰其有補於邊儲

國課豈淺淺哉臣無任惶悚待

命之至奉

聖旨戶部知道

巡按直隸監察御史臣房 謹

奏爲僨運糧儲事臣奉

勅兼理江北廬鳳淮揚四府并徐州一應徵兌漕糧除欽遵外今照天啓二年起運天啓元年分前項府州所屬漕糧額該兌改正米三十一萬九千四百五十石內奉例永折鳳陽府屬泗州糧八千五百七十石三斗一升淮安府屬安東縣糧一萬四千七百石揚州府屬興化縣糧二萬石俱每石

折銀伍錢督行徵兌間因值地方災傷該
巡按御史王安舜題爲水患蝗災叠見迺
亡墊溺幾空懇乞

天恩照例蠲折并豁新餉以固

根本以收人心事該戶部覆議被災十分海州
山陽清河桃源宿遷贛榆安東鹽城邳州
睢寧沐陽徐州沛縣泗州穎上鳳陽懷遠
五河靈璧宿州虹縣寶應二十二州縣被
災九分蕭縣碭山豐縣亳州臨淮太和霍

丘蒙城定遠盱眙天長壽州潁州興化十
四州縣各天啓元年分起運漕糧除安東
泗州永折鳳臨二縣係兌換鳳陽倉秋米
俱不議外其餘州縣俱照重災事例不分
兌改每石折銀五錢并席板輕齎在內俱
嚴責掌印管糧官徵完與同各州縣本色
糧才一齊起解等因題奉

欽依移咨都察院備劄到臣遵照通行外今該
臣查計前項被災并永折州縣共該折色

正米二十四萬六千七百三十一石九斗九升俱照題

准每石折銀五錢共該銀一十二萬三千三百六十五兩九錢九分五釐其無災廬州等府無爲等州縣實該起運本色正米七萬二千七百一十八石一升并隨糧輕齎銀兩席耗等項俱經督行漕儲叅政岳駿聲及各府州縣查照銀糧數目嚴令徵解并行各該領運把總衛所等衙門選補旗軍

催辦船料各赴水次領兌及循例委官投監兌去後續據各屬將本色糧米徵完貯倉臣又催行委官親詣各該水次將輕齎河工等銀令各府州類解漕司分別給軍起解其本色正耗糧米盤驗乾圓潔淨與本折蘆席折易等項照例監兌與廬州等衛指揮等官鄒重慶等各領運起程訖隨行

中都留守司及泗州守備齊大賓差委指揮

等官蔡啓倫等各帶兵勇在於沿河逐程
催僨併委淮安府通判連躍在淮逐幫編
號又委廬州等府通判等官王問卿等管
押督運各報船糧于天啓二年三等月二
十三等日過淮祇因東省妖賊蜂起運道
梗阻前項糧船漸次挨幫進泐入關仍聽
巡漕御史督催前進臣將兌完本折糧銀
數目過淮日期照例開造冊揭呈報都察
院轉咨戶部及總督倉場并巡倉等衙門

查考又移文巡漕御史趙于達催運外其
各府州縣已完折色糧銀見今催令差官
類解戶部交納所有監兌過各屬本色漕
糧并折色糧銀細數及有司掌印管糧官
各衛領運官職名與開倉徵完船到水次
開兌兌完各月日逐一覆覈明白例應造

冊

奏繳爲此今將造完文冊理合具本

進繳謹具奏

聞

中

六十一

